

REGIONAL NEWS

HEADLINES:-

1. Chief Minister Pu Lalduhoma'n Sawrkar hnathawk te office kai chin hriatna tur Biometric attendance chu sawrkar department pisa hrang hrangah dah belh ani dawn a ti.
2. MNF Lok Sabha MP Candidate Pu K.Vanlalvenan thlan tlin a nih chuan ram leh hnam leh sakhaw himna turin a tul apiang ti turin a inhuam a ti.
3. Assembly Speaker Pu Lalbiakzama'n Tuichawng bialtu MLA Pu Rasik Mohan Chakma, CEM hna chelh kawp mek tu chu MLA atanga ban anih loh chhan tur sawifiah turin a hriattir.
4. Ram hrang hrangin Russia-a firfiaka chetna an dem thu an sawi.

<><><>

BIOMETRIC ATTENDANCE

Chief Minister Pu Lalduhoma'n Sawrkar hnathawk te office kai chin hriatna tur Biometric attendance chu MINECO ah hman ani tawh a ti a, sawrkar department pisa hrang hrangah dah belh ani dawn a ti.

Chief Minister chuan Instagram kaltlangin he thu hi sawiin Lailen nena thawhhona ah Mizoram Sawrkar chuan Aizawl Smart City Ltd. kaltlangin Biometrics attendance chu March ni 15 aţangin MINECO-ah a hmang ţan a ti a, Biometrics Device ah chuan hmel leh kutze hnu hmanga attendance dahluh theihna a ni a, Office Staff ho kal hun leh haw hun a in record ang a, chu chu CM thlengin an lo en thei dawn tih a sawi.

Chief Minister chuan MINECO ah hian CCTV 70, leh Biometric Device 28 tih tawh a ni tih sawiin Mizoram Sorkar Department office hrang hrangah dah belh zel a ni dawn a ti bawk.

Biometric hmanga kal leh haw hun endik chungchangah Chief Secretary Dr Renu Sharma chuan nimin khan thuchhuah siamin uluk taka enzui a ni dawn a ti a, Department hrang hranga thuneituten Nodal officer pakhat theuh ruatin hei hian kar tin Department hotu hnenah an department hnuaia staff te kal dan a thehlut thin dawn a ti a, Superintendent te pawh an hnuaia thawk Group B, C leh D te endik turin Checking Officer anni dawn tih sawiin Under Secretary hnenah nitin pisa kal dan an thehlut dawn a ti bawk.

Thuchhuah a tarlan a nih danin pisa hunlaia hmun danga chhuah te chu tha taka chhinchhiah anni dawn a, Pisa vawi 3 aia tam tlai te chu CL ni khat leh a chanve ziah sak anni dawn a, Department tina hotute chu tha taka an hnuaia thawk te enkawl turin a ti bawk.

Chief Minister Pu Lalduhoma chuan Assembly Session neih zawh taka thu a sawina ah kal chhinchhiahna an hman hma leh hman hnuaia office kai dan a danglam a ti a, biometric attendance chu district level thlenga hman theih tura ruahmanna kalpui mek a ni tih sawiin sum sen a hautak hle a, sum sen vak ngailo chi department thenkhat in an ngaihtuah chhuah chu an pawm tho a ti a, Education department in QR Code hmangin kal chhinchhiahna an siam a, School zirtirtu kal te chhinchhiahna atana school hung chung atangin geo-fencing an hman pawh a tha hle a ni a ti.

<><><>

COMMERCIAL VEHICLE FARE

State Transport Authority chuan man chawia mipui phur lirthei chuan man thar a siam a, rate thar hman tan nghal a ni.

STA chuan tunkar khan thuchhuah siamin, kumin February thla ni 19-a STA thukhawmin a rel angin, man chawi a mipui phur lirthei service, taxi, Autorickshaw leh Maxicab te chuan man a bithliah thar a, 2-Wheeler taxi chu kilometre 1 ah cheng 30 niin, kilometre khat hnuah erawh KM tinah cheng 20 zel a ni ang a, Taxi pangai ah KM 1 ah cheng 55 niin, hemi hnuah KM tinah cheng 45 zel a ni ang a, Autorickshaw chuan man chu Km khar ah cheng 35 niin, a hnu KM tinah cheng 25 zel a ni ang a, Maxicab chu metal road a a tlanin, KM 1 ah cheng 3.50 leh metal road lo ah cheng 4 a ni dawn a ni.

<><><>

RS MP PRESS CONFERENCE

MNF Lok Sabha MP Candidate Pu K.Vanlalvenan thlan tlin a nih chuan ram leh hnam leh sakhaw himna turin theihtawpin parliament chung leh pawnah a tul apiang ti turin a inhuam a ti a, ram tana hma alo lak te chu mipuiten hre reng turin a duh tih a sawi.

Vawiina Aizawl Press Club-a thuthar thehdarhtute a kawmnaah he thu hi sawiin Pu K. Vanlalvena chuan NDA Seat-ah a thu dawn a ti a, NDA chu Congress kaihhruai UPA Sorkar kal dan duh loh avanga intelkhawm an nih avang leh NDA sorkar hma daih atanga an ni a ti a, a dintu zingah MNF pawh a tel tih a sawi a, NDA sawrkarin hnam tenau zawk te tana tha lo tura thil kalpui an tumin na takin an dodal zel a, hnam leh sakhaw him nan theihtawp chhuah chhunzawm zel a tum tih a sawi.

NDA sorkar chuan India ram chu hmasawna kawngah a chawikang nasa a, hmarchhakah pawh hmasawna tam tak hmuh theihin a awm tih sawiin an sawrkar leh ngei dawnin a lang a, state pachhe tan Central Sorkar nghan ngaihna chin a awm a ti bawk.

BJP hruaitu thenkhat zingah India ram Hindu rama siam tum an awm nia hriat a nih thu sawiin Pu K. Vanlalvena chuan na takin dodal zel an tum a ti a, Hnam leh sakhaw tenau zawkte tana tha lo tura chet an tum chuan na takin an dodal thin tih sawiin a aia na zawka an dodal zel pawh a la tul dawn a ti a, a tul phawt chuan ram leh hnam leh sakhaw himna atan NDA chhuahsan chu an party in an hreh lo a ti.

MNF Treasurer Pu Lalruatkima chuan tun inthlan lo awm turah Congress te nen inbe mah se harsatna hrang hrang a awm avangin party malin an kal leh zawk a ti a, Common Candidate an neih theih tak lohah chuan Pu K. Vanlalvena an ruat ta tih a sawi a, Pu Vena ang chu party dangin nei ve se an dah ve vekin a rinawm tih a sawi bawk.

<><><>

TUICHAWNG MLA SHOW CAUSE NOTICE

Assembly Speaker Pu Lalbiakzama'n Tuichawng bialtu MLA Pu Rasik Mohan Chakma, CEM hna chelh kawp mek tu chu MLA atanga ban anih loh chhan tur sawifiah turin a hriattir.

Assembly Speaker hian nimin khan Rasik Mohan Chakma hi show cause notice pe in CADC MDC Doymoy Daveng Chakma hnen atangin CADC CEM leh MLA anih kawp chungchangah complaint a dawn thu a tarlang a, Pu Lalbiakzama chuan CEM leh MLA anih kawp avanga dan a bawhchhiat thu Rasik Mohan

Chakma hi hriattirin The Mizoram State Legislature Members (Removal of Disqualification) (Amendment) Act, 2006 anga MLA atanga ban anih loh chhan tur sawifiah April ni 15 hmaa insawifiah turin a ti a ni.

State Assembly inthlan hnukung ber khan Rasik Mohan Chakma hi Chakma Autonomous District Council Chief Executive Member ni chungin Tuichawng bial atangin MLA atana thlan tlin a ni a, CEM leh MLA nihna hi a chelh kawp mek a ni.

<><><>

CYMA

Vawiina Central YMA leh Myanmar ram chungga Zohnahthlak pawl hrang hrang, Mizorama raltlana awm mek te inkawm chuan ruihhlo tih rem dan tur an sawiho.

Central YMA Committee Room-a Inkawmhonaah hian Mizorama Ruihhlo (No. 4) tam lutuk chungchang leh a tih rem dan tur sawiho a ni a. Myanmar lama Chin unau pawl hrang hrangte nen Mizorama Ruihhlo lo lut thin chu a reh theihna tura theihtawpa tanho nise tih niin Pawl hrang hrang zingah ruihhlo a inhnawih an awm chuan tihtawp ni se an ti a, Chin Hills a pawl thenkhatte nen ruihhlo chungchang hi la sawiho leh an tum bawk.

Mizorama Myanmar Raltlan awmte chungchang sawiho niin Ram leh khawtlang dan tha taka zawm tur leh harsatna siam lo zawnga awm turin an inchah a. Hemi chungchangah hian thuchhuah siam nise an ti.

Myanmar lama Zohnahthlak unau pawl hrang hrangte inpumkhatna chungchang sawiho a ni bawk a, inremna leh inpumkhatna a awm zel theihna tura theihtawp chhuah turin Central YMA hruaitute chuan ngen a ni.

Inkawmhonaah hian Myanmar raltlan pawl hrang hrang aiawh mi 42 leh CYMA hruaitu mi 30 vel an tel a ni.

<><><>

YOUNGEST PARAGLIDING PILOT

Ramchunga Paragliding Pilot naupang ber Samuel Lalbiakhlu chu vawiin khan Saitual ah ropui taka hmuah a ni a.

Saitual District Bawrsap Dr.Lalngura Tlau chuan Samuela'n India ram mipui vaibelchhe tel zinga Mizote an pho chhuak chu thil lawmawm danglam tak a ni a ti a, nunna thap tak meuha hlawhtlinna Samuela chan chuan midang tan pawh chona a pek ngei a rin thu a sawi a, Samuela hlawhtlinna phena mi tangkai a nu leh pa, Coach leh Mizoram Paragliding Association te inpekna chu fakawm a tih thu a sawi bawk.

Samuel Lalbiakhkua hian tun thla ni 16 khan Billing Paragliding Association Himachal Pradesh hnuai atangin P2 Pilot Course tluang takin a zo a, India ram record siamin Paragliding Pilot naupang ber a luah mek a ni.

<><><>

NE OLYMPICS GAMES

India hmarchhak state hrang rangte inelna North East Olympic Games neih laiah, vawiin khan Mizoram basketball team chuan gold medal an la a, mipa football inelna huangah silver medal an la bawk.

Mipa basketball inelnaah Mizoram hian Assam chu 82-78 in an hneh. Football-ah chuan Mizoram hian Manipur chu goal hnih goal khat (2-1) a hneh loin silver medal an la.

Vawiina medal pahnih an lak belh nen Mizoram hian a pumpuiah medal 50 an hlawh chhuak ta a ni. Medal a lakte hi gold medal 14, silver medal 13 leh bronze medal 22 te an ni.

RUSSIA TERROR ATTACK

United Nations Secretary-General Antonio Guterres chuan nizana Moscow-a Crocus City Hall beih a ni chu a dem thu a sawi a. United Nations Security Council chuan state zawng zawngte chu Russian Federation sorkar nasa taka thawhpui turin a ngen bakah, thuneitu dang zawng zawngte chu firfiakte chetnaa mawhphurtute chu thubuai siamsak turin a ngen bawk.

Prime Minister Narendra Modi pawhin Moscow concert-a firfiakte chetna chu a dem thu a sawi a. US, EU, UK, France, Spain leh UAE-te pawhin an dem thu an sawi bawk.

He thilthleng hi Islamic State Khorasan (ISIS-K) chuan an tihah an chhal a, Kremlin sawi danin pawikhawhtua rinhlelh mi 11 an man tawh a, Russia Investigative Committee chuan thi zat hi 115 an tlin tawh thu sawiin mi 120 vel an hliam a ni.

Nizan concert ah mi tu tih hriatloh ten pungkawm te chu automatic silaiin an pawng kah chiam a ni.

<><><>